

四庫全書

集部

欽定四庫全書

集部
丹陽集卷二

詳校官庶吉士_臣張溥

侍讀_臣孫球覆勘

謄錄監生_臣任溥

欽定四庫全書

集部四

提要

丹陽集二十四卷

別集類三 宋

臣等謹案丹陽集二十四卷宋葛勝仲撰勝
仲字魯卿丹陽人紹聖四年進士又試學官
及詞科俱第一官至華文閣待制知湖州紹
興元年乞祠歸十四年卒謚文康事蹟具宋
史文苑傳據其婿章侔所作行狀稱有文集

八十卷外集二十卷初刊板於真州兵燹殘缺
隆興甲寅知州事宋曉補之自跋其後淳熙
丙午知州事姚恪又為重鋟中書舍人王信
為之跋自明以來傳本遂絕今永樂大典所
載以類裒輯得文十五卷詩七卷詩餘一卷
又附錄行狀謚議為一卷共成二十四卷王
信跋及章惇行狀並稱宣和北伐之時勝仲
貽書蔡京力言其不可然宋史本傳不載此

事集中亦無此書又稱由兗州教授入為太
學正時上幸學多獻頌者勝仲獨獻賦上命
中書第其優劣勝仲為首今集中亦無此賦
他如本傳所載論郭天信不當提舉議歷所
論僖祖廟增置殿室不必毀其奏議並佚不
存又所稱官諭德時為仁孝學三論獻太子
者今惟存孝論學論餘無可考則其散失者
已多然觀其四分之一亦足以見其大凡矣

勝仲為太府少卿時能拒盛章之援引知汝
州時能拒李彥之括斂知湖州時能拒朱勔
之求白雀鰲鰯其節甚偉歷典諸州皆有幹
畧再知湖州遭逢寇亂復有全城之功其官
績亦足以自傳本不盡以文章重即以文章
論之在南北宋間亦裒然一作者也歐陽修
嘗輯建隆至治平故事為太常因革禮一百
篇勝仲官太常卿時復手續其書為三百卷

故于當代典制最嫻官諭德時嘗纂歷代太
子事迹為承華詔嬭又考論諸史為評古篇
故於古今成敗最悉崇寧三年居父喪盡閱
釋氏大藏經故所著作往往闡明佛理惟青
詞功德疏教坊致語之類沿宋人陋例一槩
濫載於集中殊乖文體今凜遵

聖訓並從刪削庶益為全美云乾隆四十六年九月恭
校上

總纂官臣紀昀臣陸錫熊臣孫士毅

總校官臣陸費墀

欽定四庫全書

丹陽集卷一

宋 葛勝仲 撰

劄子

進養士圖籍劄子

臣竊以三代之盛班治顯設之方尤備於成周而周之
隆教養作成之法獨推於文武文王之詩曰不顯亦臨
無射亦保故其效至於多士以寧武王之詩曰豐水有
芑武王豈不仕故其效至於無思不服雖聖人以神道

設教其精神心術之妙不可推測意者殆將以作人籲
俊為長久無窮之計非特用於一時以康庶事而已棫
樸云周王壽考遐不作人下武云於萬斯年不遐有佐
故子孫賴之而國以長楸嗚呼盛哉天佑斯文越數千
年而復生上聖應世覺民之迹若合符節惟皇帝陛下
以徇齊淵懿之資履熙洽隆平之運聖學高明道心昭
徹燭見治本在崇化厲賢故自躬斷以來首議學政大
開雍穎於以育衆才聯師儒而命之以賓興攷勸之法

革科舉循沿之陋陞進之令類出於親製程試之文每
塵於乙覽一歲餼廩無慮數百萬別為一司規畫均制不
取於縣官而坐有餘資且命諸道各設常產以資永業
行之十有餘年典法大備彬彬新美之才輩出而晏晏
忠厚之俗已成雖詩歌文武之盛無以進焉既又命禮
部以天下養士之額舍字之數費用之多寡田業之頃
畝載之圖籍掌在有司臣等恭承詔旨討論編次隨類
編括克有成書取大觀二年歲終為率既以逐州縣離

為析數又以天下合為總數凡二十有四路而中都兩
學之費不與焉彼漢中世增弟子員三千人而唐太宗
千一百區載之史牒已稱甚盛顧視今日何足道哉所
有天下養士圖籍凡二十有五冊謹隨狀上進干冒宸
宸無任戰悸屏營之至

乞以學書上御府并藏辟廱劄子

准大觀二年八月二十二日御筆禮部掌教養之事學
之興內外協力今已就緒而養士之額舍宇之數費用

之多寡田業之頃畝當職之圖籍掌在有司續准聖旨就差禮部長貳郎中編修并准聖旨以大觀二年歲終數月供具本部即不魯乞置專局糜費廩給緣大觀四年罷縣學并州縣小學給食及裁減學費舊所取會却非的數遂乞別會政和元年歲終數編纂未了間承去年五月十七日勅學校之令並依大觀三年四月以前指揮合依元指揮以大觀三年歲終數編纂今已成書總天下二十四路教養大小學生以人計之凡一十六

萬七千六百二十二學舍以楹計之凡九萬五千二百九十八學錢以緡計之歲所入凡三百五萬八千八百七十二所用凡二百六十七萬八千七百八十七學糧以斛計之歲所入凡六十四萬二百九十一所用凡三十三萬七千九百四十四學田以頃計之凡一十萬五千九百九十房廊以楹計之凡一十五萬五千四百五十四既以遂州縣離為析數又以天下合為總數凡二十有五冊而中都兩學之數不與焉恭惟陛下以有為

之資灼見治本不愛數百萬之費使隸學士之版者皆
不家食所以加惠學者至深至厚又親洒宸翰製教養
陞進之法逮今一紀人材作成典法大備調度有餘盡
由朝廷興學之初經畫永久之計歲用不煩司農水衡
而坐以贍足故其數之盛如此蓋自虞帝兩庠文武東
西辟廱以來未之有也顧視唐漢規模陋狹志氣褻淺
何足為盛時道臣等不勝大願伏乞以所編書依元詔
書上于御府以其副藏辟廱并宣示史館使陛下甚盛

德之舉詔億萬年垂示無極取進止

辭免太子右諭德劄子

臣伏覩御筆特除臣兼太子右諭德者螻蟻疏賤之臣
濫膺聖擢循省恐悖不知所出竊以有周盛時妙簡賢
智之臣以陪輔世子使日聞正言躬履正道如召公史
佚之倫乃得為之下至導諭之官蓋亦未嘗不艱其選
恭惟陛下盛德大業卓冠古初濬發明斷肇建儲位將
以中春今日發冊路寢親御燕閒推擇僚寮而臣闇劣

亦叩頭中選惟諭德之官委屬攸重非天下端士博聞
有道術者豈稱拔舉伏念臣學識行誼無以加人雖屢
塵科選薦被使令而瑣瑣碌碌訖無銖髮之效今又超
躡使贊德春闈雖仰戴君父生成之恩而退自省量大
懼上玷明公登選伏望聖慈特寢成命改授雋傑使朝
廷無虛授之嫌微臣免倖進之誚豈勝大願重念臣官
卑在法不當辭寵迫於私義不敢輒貪非據謹冒昧自
列干瀆天聽臣無任隕越俟命之至

辭免大司成劄子

臣准東上閣門告報已降告命除臣試大司成者卑賤之臣驟膺親擢聞命震怖不知所為恭惟陛下大興庠序以興斯文聲教之遠外薄海表而成均辟雍之長實總中外學政非宿德名儒豈稱任使伏念臣孤愚一介經學淺薄徒知安分守義而行能器識無以逾人昨被選除再貳國子夙夜黽勉覲有毫髮之效而訖未有聞方懼曠官以干罪戾敢謂天慈不遺微品特加因任就

進從班雖曲澤所加在臣至為榮幸而公議可畏不敢
輒冒非據之寵伏望睿明特行遷令追寢誤恩豈惟示
名器之公亦以增學校之重所有告命臣未敢祇受干
冒天威臣無任屏營俟命之至

表

賀皇帝元會御大慶殿表

歲統開端夙設九賓之會人正謹始還來四海之圖受
福無疆惟皇作極

中賀

恭惟皇帝陛下推仁濟衆體道

御時顯勲績則殆姚姒之所無闕土疆則皆漢唐之未
復車惟同軌瑞必應圖纂黃金之臺憂已消於北顧鏤
白玉之牒禮方議於東巡屬三始之肇更宜百祥之交
擁臣叨膺銅虎之寄阻望雲龍之廷稱萬歲之觴莫陪
飲栢率百獸之舞但切傾葵無任

賀太上皇表

聖謨獨斷神器傳歸縣宗社於無疆決人神而胥慶恭
惟道君皇帝陛下躋時嘉靖體道希微唐堯聞康衢之

謠有熊喜大庭之館謂青宮之預建顧黃屋以何心爰
降冊書俾嗣厯服巍巍蕩蕩難名不宰之功繼繼繩繩
永享無為之樂臣出尸祠館阻造朝班無任

賀孝慈淵聖皇帝登寶位表

祇遵聖詔光紹皇圖厯數在躬華夷交戴

中賀

恭惟皇

帝陛下睿哲天縱欽明日躋主鬯十年懋毓震闡之德
收畿千里益宅寰宇之心駿命所歸神器允屬臣夙有
厚幸蚤依末光奉匱以升寶相祚階之冠建儲之始首

叨潛府之僚方茲聖作之初阻預班朝之列無任

賀今上皇帝登寶位表

期安國步提億萬之全師遂享天心正九五之尊位默

黎有託社稷載安

中賀

竊以祖宗德澤在人國家鼎祚

方永宮居叛渙神器震搖天純祐於我邦時篤生於真
主恭惟皇帝陛下欽聰若古勇智在躬稟上聖之姿當
中興之運慷慨奮發既宅四海之心委曲全安益驗三
神之助欽承初載溥協歡心而臣久冒寵榮粗有知識

體元居正既欣厯服之有歸戡亂定傾更識太平之可
待無任

賀冊元符太后表

縟禮上儀肇舉宮闈之慶歡聲和氣鏘洋寰宇之傳家
國同休人天咸喜

中賀

恭惟皇帝陛下慕武王之繼志

同季歷之因心深惟寶祚之居臨實自先朝而弟及顧
付託之恩無以報則友恭之義致其隆內則睦族而斯
變於時雍外則繼猷而力回於國是矧翼室受遺之際

賴叔房贊策之功屬憲府之建明委禮官而訂審肆頒
孚號申進顯名懿範德音益播管彤之美仁風孝治遠
形華裔之瞻臣無任

賀立皇后表

帝度其心寅念人倫之本天作之合肆登邦媛之良化
肇六宮歡騰萬宇中賀恭惟皇帝陛下唐虞明德夏子
丕圖謂二南為王化之基而五教乃天叙之典爰諏穀
旦大正長秋彤管垂休將輔成於陰教慈闈致養見永

嗣於徽音臣服職祠庭庇身數澤欣聞椒掖之孚號阻
造楓宸而奉觴無任

代慰欽成太皇后祔廟表

寢園復土祇遵三月之期廟室寧神甫畢九虞之禮威
靈燕預遐邇盡傷恭惟皇帝陛下義極慎終孝深錫類
篤叙乃父顧元豐宮掖之賢則友其兄念永泰母儀之
重追崇特異躋祔有嚴雖紫庭永隔於音徽而清廟肅
承於灌獻願寬惻怛少副瞻馳

代慰欽聖太后祔廟表二首

役回六遂，悵復土於喬陵。祭訖九虞，肅躋神于清廟。光
靈彤鬯，遐邇盡傷恭以欽聖憲肅太后配德皇英軼功
草摯決定大策，援聖人于南面之尊。退避寶圖，復明辟
於東朝之養。欵上賓於仙闕，俄陞祔于秘宮。恭惟皇帝
陛下翼翼文心，烝烝舜慕。悼椒塗之長逝，奉桑主以致
虔。夢若平生，時起悲於脂澤。游於復道，將永奉於衣冠。
願副瞻馳，少寬悲惻。

徽音永閔徂運載周聖孝哀恫輿情蘊結恭以欽聖太
后道光周母聲掩虞嬪遭時危疑獨建大策躋民嘉靖遽
復繁機豈徒修陰教於壺闈固已懋豐功於宗社流芳
彤管將永播於億年脫迹紫庭歎甫更於暮歲恭惟皇
帝陛下堯仁因性舜慕以身疾方抱於嫫嫫孝日隆于
業業願寬哀念式副禮經

代慰欽慈太皇后祔廟表

隆名懿冊追賁泉途緝禮盛儀祔陞宗祐悲纏當宁感

劇竅區恭以欽慈太后鍾慶高閔流芳彤管夙効捫天
之兆果臻夢日之祥正位東朝莫逮含飴之樂躋神太
室空餘撫鏡之悲恭惟皇帝陛下政用湯中道隆舜孝
昊天罔極願少抑於悲摧春露既濡將永親於灌獻

徽宗皇帝顯肅皇后懿節皇后梓宮還闕表

龍輶返國蜃紉戒塗儼七萃以護行森百靈而警侍照
臨所逮哀慕攸同恭惟皇帝陛下舜孝日嚴堯仁天覆
昨奉兩宮之諱躬服三年之喪目斷殯宮日動羹牆之

念誠通宵夢每興奩鑑之悲由聖孝之感通致殊鄰之
悔禍飭使旃而遐衛奉題賸以言旋粵惟中壺之喪亦
見素輿之至列城沃醑行路涕洟匱易四重已極慎終
之禮役興六遂行遵復土之期願少抑於哀恫庶永安
於愛戴

慰隆祐皇太后上仙表

變起慈闈悲纏寰宇恭以大行隆祐皇太后慶鍾沙麓
德懋管彤頃災運之中微克保基圖之固暨逆臣之倣

擾再扶宗社之安方南土之回鑾奄東朝之告祲恭惟
皇帝陛下道光帝績孝篤母儀長樂問安極三牲而致
養泰陵復土儼六遂以在行願寬罔極之哀式副有生
之託

慰懿節皇后上仙表

椒風告祲薤露興哀慟發六宮悲纏九土竊以大行皇
后上天作合初載來嬪躬卷耳之憂勤服葛覃之節儉
方專彤管之美遽陟白雲之鄉恭惟皇帝陛下治內而

厚人倫追遠以基王化雖褱衣重翟永闕於中宮而厘
主黼筵將祠于別廟願抑聖情之悲悼式副寰宇之瞻
依

代慰聖瑞太妃薨表

柔儀長謝卹典致隆凡在幃臨伏深悲怛恭惟皇帝陛
下化先治內禮極慎終自仁率親上動元豐之感因心
則友更懷紹聖之傷追惟宮掖之賢曲軫宸闡之念哀
榮特異升賁用光孚號大庭俾聯華於二后寧神寶刹

將祔告於諸陵願少抑於恫傷庶永安於瞻戴

賀正旦表二首

年統載新禮重三朝之會陽功大湊氣滋萬寶之昌自

天降康惟聖時克

中賀

恭惟皇帝陛下宅中圖大居正

體元靈承帝以寅恭茂對時而化育方且錫符而有美
蓋將嗣歲於無窮齊七政於璣衡纏離攸叙受四方之
圖籍蠻貊來同屬治象之載頌宜神休之滋至臣等叨
恩服采籲衆造庭保合太和幸親逢於華旦緝熙純嘏

期永佑於丕圖

三朝肇祚之辰乾坤交泰萬國貢珍之會圖籍來同受

福無疆惟聖時克

中賀

恭惟皇帝陛下御時以道敕命

惟幾如日之升見文王之所以聖惟天為大同堯帝之無

能名推餘緒而運化於陶鈞撫亨嘉而躋民於仁壽矣

其文德絕域皆徠告厥成功珍符紹至惟繁禧之所介

協嗣歲以俱新厯受人時灋頒治象惟皇作極大居正

以體元與物皆昌首施仁而發政臣等蒙休盛旦代匱

正司西陸發春喜迪泰元之吉南山薦壽仰祈時萬之祥

天申節賀表

衆非后何戴欣逢震夙之辰邦永孚于休適配長羸之月自天申命薄海均歡恭惟皇帝陛下疊疊文勤孳孳舜善亶聰明而紹前烈寶慈儉而懷永圖躬五載之焦勞已開興運介萬年之逸樂益擁殊祥臣限守虎符阻趨鵷列無任

賀明堂大禮表

大禮必簡誠對越於三神至仁無親澤均敷於萬寓溥
霑惠術交協歡心中賀竊以祭數則煩在竭誠而報本
禮時為大必稱事以從宜尊天地以合祠陟祖宗而並
侑意孚明察制備情文恭惟皇帝陛下德懋日躋政修
時邁已即圓丘而蒞祀未登陽館以宗祈甫臨三歲之
期遂度九筵之邃執瓚裸鬯遣宗英而嚴九廟之儀搢
圭薦嘉被袞冕而極二儀之奉前期誕告先甲齋居列

庶尹以駿奔亘百神而咸秩祝嘏告虔於吉土輝胞俱
被於湛恩臣早預從班晚分郡寄兼總條貫無因奉倪
寬萬壽之觴宣布詔書尚能作王褒四子之頌

天寧節賀表

辰集木津寶肇出寧之旦歲臨單闕欣逢載震之期中
外稱觴邇遐拱極恭惟皇帝陛下實天元子為世道君
孝德著而九廟居歆祀事明而三神歡喜威能遠暢旣
收舊壤以來歸聖不自居方卻尊名而弗受福祥時萬

憲度日新斗適次於房心壽必齊於箕翼臣逖違宸陛
外剖郡符聽望獄之三呼阻遙鵷鷺之列賡繼天之一
曲第傾螻蟻之誠

天寧節進銀絹表

皇威遠暢坐收闕國之功壽節戴臨遙祝後天之筭共
致藩方之貢交修庭實之儀山阜之珍織紵所出仰裨
九賦少將臣子之恭虔請萬年永保人天之慶

天寧節進折銀錢表

外撫侯封猥荷分符之寵前臨誕節聿修任土之恭祇
率鍾官式遵幣貢塵三錢之府深慙不腆之儀稱萬壽
之觴遥致無疆之祝

進奉天寧節功德䟽謝詔書表

殊庭三祝虔致悃誠細札十行誤膺褒詔齋心展誦舞
手懽呼中謝恭惟皇帝陛下兆有作之聖神嗣無疆之
厯服按六經而較德懣四裔而抗棣載遇誕辰實天人
之交慶仰祈道蔭乃臣子之當然敢意慈憐申加慰藉

永惟丕享之義誓罄不移之心

賀燕樂表

名與功偕肇建盛王之樂政由俗革通新治世之音聞
視燕朝頒傳寰宇既備乃奏永觀厥成竊以原樂之初
聲相應故生變語形而上道可載而與俱厥惟聖明乃
議述作禹取身而為度夔制律以和聲雖諧鈞已格於
三神而燕樂尚循於五季爰稽中正盡革哇淫增徵角
之招而七律始全陳土石之器而八音初備有始翕從

純之美無細抑大陵之傷蓋和聲既滌於姦聲則今樂
遂同於古樂恭惟皇帝陛下道超器數治極盈成察飭
於清濁之間象事以始終之序曰惟嘉饗深厭溺音立
度出均始達神明之德登歌下管遂同天地之和順氣
應之治道備矣臣等無裨政化猥預榮懷為韶九成聽
鏗鏘而竊嘆大食三省願保用於無窮

賀日戴承氣表二首

化牟乾運洪恩丕冒於邇遐祥開日華瑞氣並生於上

下光騰羣目慶決與情竊以行中道以揚暉宗衆陽而
循度旁出纓珥皆兆福祥見於戴者為國有喜之占名
以承者示臣奉君之慶乃底日之官程奏與說天之志
協符陽春方中晷景正午躋茲並應寔表多祥恭惟皇
帝陛下盛德昭升至仁光被無思不服人文已應於豐
亨將受厥明天瑞遂形於晉晝臣等具叨眷獎莫效燮
調政察璿璣奚測彌綸之妙氣調玉燭徒深抃蹈之誠
帝德誕孚仰格景炎之應天休滋至繼騰瑞氣之華殊

祥相望於後先美證交輝于上下清臺禱候寰宇均歡
竊以天惟陰隲而降監孔昭日乃陽宗而象類可考堯
命四時之官而謹賓饌周以十輝之法而辨吉祥曰戴
曰承曠千齡而莫睹乃神乃聖遂彌月而再瞻蓋一德
新而又新則諸福至而復至

賀日蝕不及分表

官占前告知交數之當虧聖德上昭致蝕分之不及照
臨所逮距躍惟均

中賀

竊以躔度相循實應大餘之數

陰陽有眚乃侵內壤之光惟精意之潛孚則沴氣之遽
弭保章辨吉祇視觀祥有感必通蓋欽若寅賓之證方
交俄吐示及遲蝕寡之符恭惟皇帝陛下道與豐亨德
參離照雖運彌綸之妙用不忘寅畏之小心天且弗違
人其皆仰臣等謬膺眷獎服在弼諧修六職以導和仰
繫庇冒率四方而來賀但切懼呼

賀日蝕陰雲不見表

日當合朔前知薄蝕之期雲起崇朝潛護照臨之體坐

銷沴氣溥洽歡心中賀竊以陰陽不免於交侵日月有時而同道蓋盈虛之定數在分至以非災繫聖德之召和致天心之助順雲特瞻於游宇辰自應於集房恭惟皇帝陛下秉總泰元均調冲氣思其艱而制治正厥事以承休雖厯步日微莫逃常度而德孚陽感自隔妖氛臣等積在慈憐敷同慶賴抑陰用社既虛十輝之占籲衆造庭願上萬年之壽

賀慶雲表

氣襲一陽方誕膺於神貺雲舒五彩復昭示於天休登
臺以書擊壤咸喜中賀竊以黃帝有華蓋之瑞因以紀
官漢皇祀汾陰而歸嘗聞覆鼎載諸往牒已號殊祥矧
當至日之漸長方即路朝而展采儼九賓而就列鏘六
玉以導和紛郁呈祥輪囷曜色盪紫霄之氛複映黃道
以昭回於稽盛德之符茲謂太平之應恭惟皇帝陛下
欽聰稽古寅畏享天僕景命於無疆告成功於不宰克
開厥事秘文兆見於堯天恭受于庭卿霽復光於舜日

臣等備叨殊獎獲相上儀若烟非烟幸親瞻於瑞蔭既
旦復旦願永播於賡歌

賀收復湟州表

爰整其旅起舊將以徂征克成厥功恢故疆而盡復捷
音來上歡頌遠傳中賀竊惟湟水之封陲實通橫山之走
集地形控阨天聚富繁歸我版圖昔有招攜之效弛其
檻縲誰為縱敵之謀屬聖武之紹興幹神機而獨運星
文助順軍氣益張匪安匪舒遂有來鋪之效是致是附

坐收無悔之功恭惟皇帝陛下通求厥寧載用有嗣赫
赫業業而天威遠憺烝烝皇皇而兵勢具嚴憬彼邈川
故無勞於折箠蠢茲偽夏行亦見於消烽

賀收復燕山府表

取亂侮亡曾未施於三箭向風慕義遽求効於九州惇
黎輸款塞之誠渠帥有倒戈之請事光惇史慶溢縣區
中賀惟幽薊之封疆本華夏之土宇粵從東晉始蹙版
圖垂二百年擅數千里凡謀國之士議弗敢及致在天

之聖志未克伸惡稔罪盈衆怨神怒冠戎越在草莽師
衆日尋干戈仰怖德威如洪爐之燎毛髮斲霑聖澤若
大旱之望雲霓遂掃境以來庭同叫閭而請命恭惟皇
帝陛下神武不殺睿智有臨救民水火之中玩敵股掌
之上全付所覆仰承穹昊之休通觀厥成大洒祖宗之
憤舊壤再歸於中土經躔遂備於周星成茲不世之功
盡出非常之斷臣叨膺郡紱阻獻壽觴撫鳴劒而馳伊
吾徒深賛喜登泰山而建顯號行慶升中

賀湟州芝草表

青唐慕化籍疆土以咸歸朱草薦珍走驛郵而來獻凡
依怙冒交劇歡呼竊以齋房之詩徒著九莖之異瀛洲
所產第存三秀之名彼固推為盛時亦復號稱華觀蓋
未有叢生千葉遠叩九閭截然新附之邦卓爾無前之
瑞揚華茵蠢託質堅剛介夷貊以郵傳曠古今而創見
此蓋伏遇皇帝陛下化由神運道與時行默調撫於五
辰遂昭蘇於衆彙張咸池之樂以流於協氣定郊鄆之

金部人二
卷一
鼎以召於嘉祥因積人和且膺帝祉案諸圖牒共欣蔓
蔓之形播以聲歌永配巍巍之治臣等生逢昭代獲覩
上儀敢同來賀之四方共祝無疆之萬壽

賀瑞石表二首

臣某等言伏覩河東轉運司進瑞石一據待詔封士寧
狀稱磨礪已凹尚見天正堯瑞字并御筆驗到詣實與
元圭同宣示百官者告厥成功申錫久淪之至寶震于
珍物是興前告之殊祥質雖玉石之殊意若節符之合

中賀竊以禹底濬川之績堯受延喜之圭雖乎尹尺二寸以標竒然湮沒三千年而莫覩天將授聖理欲斷疑爰出秘文以彰休應得自樊山之壤又為汾水之都究點畫則本于自然考符瑞則昔所未有披圖輝耀豈同鳳羽之成文結體瓌竒恍若龜書之再出屢磨礪而不泐將藏秘于無窮恭惟皇帝陛下仁以則天智惟稽古孝悌而致萬邦之協欽明而臻庶績之熙治既比隆福因緣類皆不求而自至蓋合異以為同臣等叨預近司

親陪昌運地不愛其寶幸獲觀瞻邦永孚于休惟深呼
舞

圭呈元色將昭受于大庭石出秘文預協符于上瑞四

方同賀百辟聳觀

中賀竊以龍甲浮河伏羲因而畫八

卦龜書出洛箕子所以演九疇厥惟自然之文每出大

明之世不求而至獲于汾晉之都載考其繇欲正陶唐

之瑞緘滕來上磨礪愈明究字畫則非筆墨之能工語

休祥則寶圖牒所未有闡神明之奧蹟胙歷服之繇長

道之將興國以長楸恭惟皇帝陛下則天覆燾如日照
臨克明俊德而仁厚于傳宗不廢窮人而政修于無告
巍巍之功既就赫赫之應遂昭臣等叨預近司預觀懿
鑠何知帝力載賡野老之謠請壽聖人更類華封之祝
賀水晶大花金碼碯興發表

天人精稔有感斯通山澤韞藏不求自至三邦程奏萬
宇均歡竊以貴異物非聖哲之本心致大利乃帝王之
盛節蓋仰膺於天祐必並顯於坤珍壤帶洛師發千年

之水玉江連甕管聚萬鎰之精鏐顧惟寶石之英舊產
大荒之遠乃於近甸併效殊祥恭惟皇帝陛下協諸福
之休擅無倫之富政事修而錢流於地上年穀熟而粟
腐於闕中民各厚生地豈愛寶惟茲三幣並出一時掌
在升人不假地圖之授藏之玉府永為邦賄之良臣等
猥被眷求親陪熙泰治道備矣何施寅亮之功寶藏興
焉幸預榮懷之慶

進奉生擒睦賊渠魁馬謝詔書表

師行左實旋掃逋誅貢効右牽蓋伸常禮顧煩神指曲
降璽書誦讀知榮捧承失據中謝伏念臣守近服屬討
允渠方鞠旅於前茅曾乏先登之助暨致刑於獨柳徒
將曲踊之誠弗悟溫言特光孤跡此蓋伏遇皇帝陛下
宅師嘉靖基命溥將有此武功既宣威於暴亂矢其文
德更加惠於臣鄰雖處外而亦臨俾增重於所涖道三
二帝幸親遇於昌期文七六經永襲藏於館室

謝收復燕雲進馬賜詔書表

復境金臺師既殊於左次稱觴玉殿貢輒效於右牽敢

意恩綸俯光衡宇

中謝

恭惟皇帝陛下智勇天錫徇睿

生知稽古則斷自唐堯以來治外則雜用采薇而下爰
修羽干之舞同乎舜功之巍巍不遺蟣蝨之臣賜以周
書之噩噩深惟榮遇實責餘年願加拾襲之藏更殞百
身之報

欽定四庫全書

丹陽集卷二

宋 葛勝仲 撰

表

謝特賜謚先考清孝表

鄉書程奏仰蘄揚善之公廷議具孚特被易名之寵恩
光下逮感涕無從

中謝

竊以名者實之賓必考一時之

德謚者行之迹永垂萬世之傳禮欲示于勸賢義特嚴
於節惠魯無駭則生有正卿之貴衛公叔則請於將葬

之時若乃爵未及而特崇寔已久而追命自非絕德曷
勝殊榮仰惟先臣夙有卓行飲冰自勵清每畏于人知
負米服勤孝實由于天稟十年辭祿而養志一介不取
以律貪蹈曾閔之所難拔夷齊為可慕善每為而最樂
徒信所聞道雖闇而日章其傳自遠敢圖二美上達四
聰畧省戶之參稽置禮官之訂議特旌潛德俾受大名
此蓋伏遇皇帝陛下公聽並觀蕪容泛愛同帝堯之稽
象法湯后之立賢不吝飾終特甄收于片善未嘗忘遠

曲崇獎于下臣爰霽恩綸來光泉壤殞百身而莫贖永
悼循陔想九原之有知尚期結草

謝降詔不允乞外任表

教而知困竊幸退藏道以觀能尚寬澄汰親奉德音之
獎勵繼膺溫詔之撫存宜去而留以榮為懼中謝伏念
臣蚤蒙擢序馴致高華聯禁塗供奉之班躡轡舍師儒
之長冒居厥次未報隆恩輒乞其身實緣私義蓋明倫
善俗之時希遇則育材成德之任至難無作人之助則

為曠官無授業之長則徒廢學如臣愚陋涉世闊疎可謂人師雅無重望於斯碌碌屢荷容容徧塵胄子之官久妨賢者之路鼯鼠窮於五技難復進為鷦鷯巢於一枝庶安拙守故因次對自勉治民敢意包荒尚容游食獎以評文之當責之振職之稱既蒙踰袞之褒復荷出綸之渥大哉之言誕播蕞爾之跡有光此蓋伏遇皇帝陛下豐照直中乾剛獨運懋昭大德通求多士之寧灼見俊心深識百辟之享肆憐平進更責後圖誓殫分教

之勤少報兼容之施

休寧知縣謝上表

躡廁儀曹媿匪小材之累日除還銓部猶叨大邑以庇
身荷恩難名報德無所中謝伏念臣人門俱下仕學並
輕雖偶竊於科名本自甘於州縣識拔誤除于師席編
摩進直於書林佐貳宗英預掌銀潢之津派登延冊府
獲窺金匱之圖書每自疲於超踰豈復睎於擢序久尸
官於省戶曾乏建明屬議禮於宗祊遂成瘵曠蠹何施

於測海蛟果困於負山特煩簡禮之嚴上瀆冕旒之遽
止從澄汰實戴矜容此蓋伏遇皇帝陛下堯釐百工舜
明庶物黜陟必先於考績賢愚咸使之遂情若此無能
尚有攸處臣敢不承流宣化勉報政於三年念咎省愆
誓輸忠於九死

大司成謝上表

入持禁橐已媿超遷進長經蠻更叨因任循涯虛受程
奏懇辭膺詔旨之弗俞錫服章而加賁亦既就職深虞

累恩中謝伏以蕪三代之學以明人倫同四海之風而
暨聲教大申孝弟之義交獻賢能之書歷年滋多明效
灼見小子有造預鼓篋者千人海邦從來執經者萬
里惟時教法特軫淵衷責古人大全則薦降德音示聖
經奧旨則親為訓傳蓋躬教立道之君處上則育材首
善之臣至難方廣詢求以專屬任而臣學非得已才不
加人行誼不足為世之範模文藻不能作經之鼓吹偶
自朝廷興學之始首叨方郡分教之官玷禮曹郎屬者

四年預胄席師儒者三等所能何有每遷益高雖賓賢養士之規模粗知本末顧成德達材之績効蔑有毫釐不悟異恩就躋邇列此蓋伏遇皇帝陛下誕敷文德通圖康功久於道而化成不忘樂育主其心而慎治更務能官察臣所守之靡他貸臣已試之無驗猥加曲澤使勉後圖誓畢微生仰酬洪造

謝江州太平觀表

躋榮命教濫居學省之華負罪投閒尚竊祠宮之適寬

恩下逮感涕橫流

中謝

伏念臣學術空疎性資愚拙本

為貧而干澤寢席寵以逢時俾游英俊之躔盡出聖神之
造班陪從橐袂冠儒宮顧惟何人輒膺是選果緣冒處
遂致疾顛仰繫亭毒之私猶頒餽廩之厚此蓋伏遇皇
帝陛下德侔天大恩均父慈擴仁恕以并容寬聰明而
臨照深閔向隅之戚特從祝網之寬退居寂寞之濱得
從優逸上答生成之賜更誓靡捐

謝復右文殿修撰表

殊庭游食深幸安全秘府疏榮特從甄序隆恩下逮感涕橫流中謝伏念臣學不造於道真材不周於世用自奮寒苦三收詞藝之科寢冒寵嘉四躡師儒之等欽承綸綍俾長膠庠退量羊質而虎皮何補鳶飛而魚躍駢駢但期於報國顓愚實昧於周身惟行法已拂於人情而處事每違於時論怨仇交積釁咎易乘猥自効歸親乘訓獎慰留之詔始下搏擊之疏繼聞凡可排根而中傷無不崇飾而誣巖莠言甚巧惑投杼於三人幽結莫

申類降霜於五月賴乾坤亭育之施察風波險陷之危
曲示優容止投閒左微生易殞聖造難酬旋聞邦誣靡
逃天鑒阿比附會著在德音放逐流離屏之荒服臣之
所坐豈假自明遂令流露之餘曲被便蕃之澤稍責集
賢之職漸刊司敗之書此蓋伏遇皇帝陛下覆露萬邦
帡幪庶尹風揮日舒而專斷雲行雨施以均慈蹈舜之
文哲而審官體湯之寬仁而宥過肆令浮賤不遂棄捐
恩已重於丘山實踰始望身未填於溝壑誓竭孤忠

汝州到任謝表

序道山之祕職已荷䟽榮殿陸海之名邦更蒙起廢苦心易感危涕自零中謝伏念臣器識無以加人學問本期治己會睿神之博採旅俊哲以同升徧歷清塗皆非素望直棧傳廐雖知戒于回邪方穿運車顧每難于諧合昨承人乏進長國庠雲漢為章于天何裨化養日月有明必照獨荷矜全數侍清閒薦膺訓獎維時邦汭方擅臺評凡可傾擠而中傷無不誕慢而崇飾倘非洪造

豈有餘年矧退黜僅及再周而恩渥已更三至既察采
苓之罔遂叨剖竹之榮濱九死而復生殞百身而曷報
此蓋伏遇皇帝陛下宏規籲俊大德容愚曠然兼覆之
恩仁為己任展也大成之業善與人同故雖無庸不使
終否臣敢不益殫夙夜之力少紓宵旰之勤懲沸羹而
吹薤更防後患羨淵魚而結網勉企前修

謝改寶豐縣名表

建節近藩已旌地寶錫名支邑更荷天慈間井祇歡山

河增重中謝竊惟汝郡密拱神臯鬱葱之佳氣旁連汪
滅之湛恩光被是興寶藏以表珍符沓來州人底貢玉
府蜚緣最爾之境申錫美哉之稱此蓋伏遇皇帝陛下
富擅無倫化行有截爰正名於百物以彰信於兆民旬
服用光信書惟永臣謬膺優寄躬被德音順事成實
佩褒康之寵政平訟理益圖報塞之方

為輒奏儀曹馬俊公事放罪謝表

獄獄非疑自奸罪譴疏恩過厚特飭憲章荷德自天措

躬無地中謝伏念臣中緣擢序外預使令兢兢詔令之
遵齟齬簡書之畏謂獄者天下大命而刑本君子盡心
寧失不經上體好生之德何度非及顧無閱實之良輕
黷九重特寬三尺此蓋伏遇皇帝陛下斤斤之明進日
恢恢之網如天知非法吏之深文爰貸守臣之妄發臣
敢不知逃簿責益務簡孚觀過知仁幸不書於一青咸
中有慶庶圖報於萬分

謝除顯謨閣待制表

竄名簡札久奸刑史之誅寓直圖書忽玷侍臣之選驚
魂返幹感涕交頤中謝伏念臣於世無庸以身得察不
繇援助徧歷高華自信直前未免木鴈之累周防慮害
又乏著龜之明遂招貝錦之言上瀆細氈之聽仰承辨
究曲賜保全起之祠宮付以民社義命大戒方勵志以
力行富貴危機實無心於饗取矧惟伯氏獲綴近班甫
依日月之光遽淪霜露之疾顧滿盈之招損復愴盡之
傷生方圖幽屏於衡門敢意寵登於巖閣此蓋伏遇皇

帝陛下在帝陟降憲天聰明體堯之大以容愚用舜之中而忘過念茲簪履之舊援之溝瀆之中臣敢不黽俛事勞緝熙問學命輕於羽期狗道以忘身誓有如江顧輸忠而報國

湖州謝到任表

服勞盡瘁敢擇地以求安積釁挺災輒籲天而瀝懇豈圖名郡驟假畸人中謝伏念臣褫職無庸駸駸難合入塵禁近深慚乍佞而乍賢出預承宣惟知畏首而畏尾

迫于多瘠尚爾自營荷臨照之末光遂寬閒之素志惟
召雪之勝壤號吳越之樂郊杜牧之三啓請行王逸少
二代繼守豈期泛宅之地乃獲專城之居此蓋伏遇皇
帝陛下體文王之淵懿以官人蹈虞舜之聰明而臨下
界矜無告特為相攸仰稱慈憐誓當勤策挈紕荷橐徒
夢想于清都坐白蘋洲幸日陶于化國

鄧州謝上表

危誠自列本緣三五之嫌洪造曲從改涖一麾之寄奔

走奉職經營戴恩中謝伏念臣早幸逢辰過叨序爵容
臺絕禮往來數預于討論教府育材伯季迭居于長貳
實備聞于德意敢中畫于初心旋以拙疎久坐流落既
不肯逐巧黠妍而射利又不能變節易操以隨時歲籥
七更徒或夢遊于帝所國門三過何階入覲于天儀進
無扳聯之因退守靖共之素惟茲楚境蓋昔鄧墟令臣
領之為幸多矣此蓋恭遇皇帝陛下蹈虞舜孳孳之善
廓武王斤斤之明攬治具而畢張鑒人材而翕受少原

之簪惟舊未忍弃遺豐城之劍可求聊加拂拭臣敢不
布龐洪之惠澤佩煩悉之訓詞為國矢謀雖身遠嚴徐
之列與民興利尚志睎召杜之風

再任湖州謝表

復舊歷之近班已叨式序付嘗為之便郡更荷就除不
涉道塗即交印綬中謝伏念臣任過其量德慙於榮內
之代置於京師徧陪禮樂學校之寄外之服勞於郡縣
備諸簿書獄市之煩自黷真祠屢更嗣歲敢圖起廢復

玷承流今所領州昔嘗任事法令具在誰言厦屋之幘
幘民俗可知妄指甘棠之蔽芾今茲器使實累詔除而
臣益老無堪積憂多畏動而輒礙豈能游刃以解牛去
已復來徒類下車而搏虎此蓋伏遇皇帝陛下運天德
以君世續帝緒以膺期體道時巡擇賢共治特加申命
更勉後圖惟自誓於靡捐庶少寬於憂顧馳朱丹轂敢
從事於燕游探赤白囊第謹修於備禦

謝除顯謨閣待制表

奉混元香火之祠獲從安便直永裕圖書之閣復玷高
華方課職以投閒顧冒恩而席寵辭不獲命懼何以堪

中謝

伏念臣江海腐儒布韋冷族以身自勵妄期兄弟

於古人賦命多奇動輒參辰於時態昨膺申命來撫舊
封當帑庾空匱之時適衣冠流寓之衆長鞭不及馬腹
寧免多仇割雞馬用牛刀敢言易治拙疎若此汰免是
宜敢期肆眚之隆寬不以曠官而賜隔還青羶之舊物
綴紫橐之清班此蓋伏遇皇帝陛下時邁其邦日新厥

德攬智瘝而兼用作威福以並行蕩蕩巍巍每擴堯天之覆左左右右特從湯網之寬臣敢不知幸之不可常念德之宜有報益堅素守更勉後圖

謝賜歷日表五首

仰求天步運太極之三辰俯授人時協洪範之五紀祇膺詔旨灼見聖心中謝伏以考中星之合見而生昏明課九道之發斂而定冬夏積大餘小餘而綜數辨陽歷陰歷以求端雖云觀象之常未若紀元之密開綴文之

局而演議推立極之日以為元鑿井耕田共識作訛之
候連珠合璧間無杪忽之差恭惟皇帝陛下化妙範圍
仁深覆育循堯之道以閏月而定四時用夏之正坐明
堂而朝羣后臣出守支郡辱賜新書豈徒尊閣以知榮
敢不奉承而加畏

協用五紀永執其中猷告多方不匿厥旨仰推天步俯

授人時

中謝

竊以設南正北正之官實繫順帝辨西陸

東陸之候所以序年惟章分節元之不差則析因夷隩

之攸叙厥惟舉正乃克求端恭惟皇帝陛下官天地以
範圍厯日月而迎送清臺雜候既謹於疇人陽館誕頒
每先於嗣歲惟聖時憲以初為常臣謬廁承流寵膺錫
本昔嘗忝職慙無綜數之能今幸牧民願廣正時之惠
協用五紀底日而無失日之差允釐百工後天而有奉
天之謹中謝竊以帝營序星辰而著衆唐堯欽厯象以
授人厥惟盛明必精推步顧紀元之衍數本基命以求
端閏餘靡垂宿離皆正恭惟皇帝陛下恩涵品庶道格

昊穹坐行政之堂定四時而成歲頒在躬之厯敘五福
以錫民臣敢不祇奉璽書寅遵神策昔緣推澤嘗預於
討論今冒承宣敢忘於尊閣

發政施仁誕布自天之詔歸餘舉正特頒底日之書職
在承宣敢稽播告中謝竊以南正北正以司天地義仲
和仲以理陰陽惟分至啓閉之預和則風雨晦明之可
候肆於獻歲之始大宣告命之文恭惟皇帝陛下寅奉
夏正率循堯道面稽天若欽授人時俯察仰觀千歲之

日可致下蟠上際萬物之生得宜夙推步於清臺繼頒
宣於方郡志以定言行以出令拜賜札以璽書祗膺周
誥奉萬年之神厯允協夏正上體求端敢忘承式

發春獻歲誕臨行政之堂舉正履端昭示在躬之厯凡
叨寵錫悉被恩榮中謝伏以鳳鳥呈祥定分至啟閉之
候冀英紀瑞辨作訛成易之方起消息而正閏餘分辰

野而步躔次五者來備各以序萬物之生得其宜蓋惟
保乾道之和乃能致帝者之用恭惟皇帝陛下紹隆景

命光宅丕圖調玉燭而和四時在璇璣而齊七政連環
合璧仰無杪忽之差轉扇飛灰俯有桴鼓之應肆頒告
朔爰及守臣敢不虔稟聖謨率循彛憲焉知天道昔嘗
預於討論不違農時今第嚴於遵奉

代皇子辭官表

仙源襲慶曾微橫草之勞睿檢疏榮遽被苴茅之寵輒
輸危懼仰冒隆威伏念臣姿實滯冥質非歧疑本支錫
羨當詵詵揖揖之辰德齒甚微媿穆穆皇皇之美方上

煩於顧復冀少廸於顓蒙敢圖敷號之揚廷特相與區
而燾社秩均揆路寄重帥旄惟茂勲明德之可居豈弱
植幼齡之敢冒伏望皇帝陛下俯矜愚款追寢贊書名
器至公特正君臣之分悃誠獲訴益隆父子之恩

代皇子再辭官表

循牆懇避既瀝於愚衷賜履䟽榮未回於渙號仰蒙覆
露輒再冒陳伏念臣託體天支承顏帝宸銀潢分潤日
承鞠育之恩金輅啓封敢意褒揚之寵顧未親於保傅

已視秩於公師相南土以建旄保東方而受社並疇多
賦併衍真祖皆非分義之所安敢罄懇誠而再瀆伏望
皇帝陛下至明旁燭大度兼容俯矜髻鬣之姿特寢絲
綸之命朝廷之上庶絕於叨逾父子之間何容於偽慢

代皇子謝授官表

程奏上千冀回於成命恩言狎至終閱於俞音祇受寵
靈第蒙榮灼中謝竊以勝衣佩印存漢室之舊章睟日
錫封實本朝之故事敢圖庸昧亦玷褒揚伏念臣質異

徇齊年方稚孺屬椒聊之繁衍聯棣萼以輝華顧子職
之未供荷王靈之先及建節旄而賜履按輿地以建邦
命服九章粲威儀於上宰元戎十乘峻節制於帥垣曾
是孱微併叨寵獎此蓋伏遇皇帝陛下堯親九族舜聞
四聰念生子之在初雖多男而授職誓永堅於忠孝庶
上答於生成

代謝賜名表

趣令安位已被恩綸諭使更名更紆親札宸廷馭幸間

府增華中謝竊惟名以制義者禮之經言惟作命者上之寵惟叔虞季友之類父命有稽而唐武將義之倫君賜為重臣逢時獨幸奠食久浮敢圖賤名更出睿意憐其許國之志使堅戴后之誠問于申繻不犯廢山之戒比之程昱更超加日之榮此蓋伏遇皇帝陛下雖聖弗居以慈為寶肆推曲澤以賁餘年三月而名雖動已孤之感千載之遇更懷難報之恩

代嗣濮王謝升等表

祇受寶符永佑基圖之固載頒睿渥曲惇族屬之私凡
預庥涵交深呼舞中謝竊惟濮王之支裔皆為英祖之
懿親論小宗則勢實綿聯視正統則稍為踈逖因禮有
等衰之辨故法從降殺之文戚卑者既罷賜名行卑者
遂無廢爵生息寢廣貧富不均題聖度之獨觀裁宸章
而親定謂自義率祖雖或貴於斷恩然立愛惟親固無
嫌於廣孝爰因熙事丕變舊章官以行而迭升爵因名
而更制情文俱盡恩義兩隆磐石相維更益廟祧之重

綸言下逮永為戚邸之光此蓋伏遇皇帝陛下聖德盡
倫王功邱隱體堯仁而惇九族紹舜孝以協重華肆令
葛藟之生共仰蓼蕭之澤願深圖於報稱當共誓於靡
捐

代謝宣詔再入翰林表

禁林清切登用詞臣家巷光華宣傳詔使仰膺申命實
載隆恩中謝竊以冠內朝供奉之班代中宸訓詞之任
粵自前世號為要津資東里潤色之材處北門獻納之

寄扉開銅式地秘金鑾樂府立成乃有謫仙之譽嘉謨
叅決因存內相之名矧在聖時勃興文治睿藻獨高於
夏古諸臣莫望於清光雲漢為章獨昭回於萬物風霆
敷號將鼓舞於四夷宜得名儒以當內制而臣衰遲無
用竅啓弗靈問學久踈矧久廢而將落文詞甚陋又已
試而罔功何期過采於虛名復使陞華於故職預擁經
於帷幄叅酌史於青編是皆劇榮併茲虛授此蓋伏遇
皇帝陛下宏規遠撫聰聽旁周圖回萬化以更新收攬

衆材而求舊殊私所逮懇避弗俞奮發詞章雖莫追於作者激昂忠義當不媿於古人

代謝不允乞外表

忱辭冒進冀乞其身恩旨俯頒俾安厥位叨榮未已席寵更慙中謝伏念臣獨荷聖知再司邦計本圖尺寸上報丘山衰疹所嬰筋骸知馬力之竭劇職寢廢智謀同鼠技之窮懼速大呵上孤殊獎爰即威顏之座具輸肝膈之誠為聖人氓丐就祠庭之佚避賢者路冀辭省戶

之華不悟眷留中加慰撫此蓋伏遇皇帝陛下疏觀萬
化原省衆材察其籲天本非擇地特加因任使勉後圖
大哉一札之言永期尊閣冀爾百身之殞曷稱恩私

代辭官表

旌壇所指肇闢遐疆綸綍載頒創增崇秩敢緣私分進
冒隆威中謝竊以通求厥寧躋躋聖神之造采入其阻
桓桓仁義之師飭偏校以鷹揚係名王而蟻伏鋪敦積
石奄有臨洮初無遺鏃之煩坐致舞干之格曠古未賓

之地悉入版圖窮荒始附之民交通輶譯仰繫睿斷用
底膚公如臣謏才荷國重寄曾乏幄中之畫少裨聞外
之奇乃緣策勲亦叨序爵矧預聞於政事已屢玷於恩
華儻無止足畏避之心必有亢滿顛躋之慮伏望皇帝
陛下監觀本末惠顧始終憐其深懼於高明察其非涉
於偽慢斷從公論追寢命書位必勞升盛世固無以虛
授利因義勝愚衷亦幸於少安

代謝授官表

興師奮伐吉語遽聞疏爵疇功恩言濫至懇辭弗獲祇
受若驚中謝竊惟洮陽之奧區實為隴右之故壤地形
控阨天聚富繁早紆先帝之經營尚習狂童之矯據神
機默運聖武嗣興詢謀將才指授廟算不淹決日坐取
列城彊弩何難於射癰震霆不及於掩耳游魂假息望
旂鼓以驚奔泥首歸誠襲冠裳而款附震疊三河之外
鋪敦青海之隅用夏變夷皆繫睿畧因人成事豈有微
勞敢圖近弼之頒恩亦使瑣才而居寵此蓋伏遇皇帝

卷二
陛下英威服遠盛德容愚土宇版章中外禔福謂義已
加於不齒故賞寧僭於罔功特示睿慈俾霑優渥昆
夷駢矣忻聞正域於四方元首明哉敢獻無疆之萬壽

代謝朝參減拜表

便蕃曲澤屢沐矜憐疲曳微軀特從優假禮稍寬於擎
跼心深負於凌兢中謝伏念臣生值休明坐尸華顯莫
食久浮於真館疏榮更昇於戎旃雅無橫草之功少圖
稱効徒有負薪之疾上軫眷懷乃知極辨之朝蓋有常

尊之分敢意惓惓之厚施特錫僕僕之多儀此蓋伏遇
皇帝陛下德冒臣鄰庥涵戚屬謂禮雖宜於下拜而恩
或出於非常因屈威顏俾蘇衰繭馬力將竭已逃顛踣
之虞鼠技既窮尚誓靡捐之報

代謝敕設表

內苑贊書叨蒙宣召太官宿設更沐示慈荷蒙便蕃省
躬殞越中謝伏念臣初非博綜繆辱詳延修飾討論何
補聖謨之懿飲食燕樂遽蒙臺饋之頒此蓋伏遇皇帝

陛下優異詞臣恢張國體因其蒞職之始訓以稽古之
榮臣得盡心遠繼鹿革之盛物無失性更同魚藻之和
徒媿屬饜莫知上報

代兗州謝上表

潞子名邦方膺守寄魯侯舊壤誤沐詔除已稅道塗敬
頒條約中謝伏念臣羈危少與謹朴自將涉獵簡編粗
識誠身之趣平均法令稍知布政之經徒欲少亢於衰
門詎肯求通於曲路微如鼯鼠方自足於飲河勢若窮

猿固未遑於擇木握蘭省戶剖竹藩方自視數竒皆非
始望矧岱宗之重鎮存闕里之故家支邑民淳狴牢罕
繫屬城盜息桴鼓稀鳴豈伊衰遲曾是畀付茲蓋伏遇
皇帝陛下建五皇極奉三無私宣化承流雖博求於壽
俊匿瑕藏疾亦兼採於愚瞽臣敢不推廣上仁循緣舊
俗布中和而樂職戒煩苦之傷恩尚有毫釐仰紓宵旰

代沂州謝上表

汎掃真祠方自安於祿隱改臨樂土忽誤玷於除書仰

冒大恩退慙小邑中謝伏念臣江湖冷族庠序鯁生遭
時博延與士彙進擢佐水衡之重曾靡荒功再將使節
之嚴塵無乏事遽陞華於蘭省獲款對於楓宸橫草無
勞自媿含香之選負薪有疾因求襍被之行蕭散再葺
優游三徑敢圖紀錄復被使令矧所領州昔嘗試吏雖
歲月驚於云邁而父老喜其復來此蓋伏遇皇帝陛下
施實德以厚生圖康功而通駿敷求良吏分列遠邦因
誤聽聞遂叨識擢臣敢不布朝廷寬大之澤謹惠文織

悉之科誓勉後圖庶逃幽黜

代謝賜御書千字表

辭榮弗獲煩一札之恩綸示眷有加錫千文之草聖昭
回在望冗末增華中謝伏念臣久玷近嚴薦膺寄屬當
制禮作樂之運竊幸預榮方崇儒重道之辰獨蒙加惠
溫言慰藉曲澤分頒仰惟奎畫之文實出神機之妙卧
筆遠嗤於禿兔正書何取於怒猊肆筆而成非由水墨
之積習為章于上宜有神物之護持不悟鄙居忽叨珍

賜此蓋伏遇皇帝陛下睿文冠古獨智窮神道積于厥躬不忘典學天縱之將聖又極多能因點翰於燕閒特疏恩於禁近寫之金石永圖尊閣之藏燕及雲來共侈眷憐之寵

代謝對衣金帶馬表

腰束九環併荷笏衣之寵固頒四牡仍加絳革之華感劇曳婁榮生罄控中謝伏念臣少罹陞阮自守羈單服止獎裘輕煖敢睎於狐貉乘惟下駟權竒絕望于龍駉

不悟遭逢薦膺錫予此蓋伏遇皇帝陛下緝熙政治寤寐雋良恩示解衣俾勵素絲之節意存市駿寵頒赤汗之珍粲粲陳庭駟駟在廐於其視職出以疏榮鵜翼不濡俱積叨塵之媿蟻封可試庶無顛沛之傷

代高麗王謝賜太平御覽表

悃誠上訴懇求祕府之文恩渥繼頒曲徇殊隣之請始終展誦俛仰兢榮中謝竊以太宗皇帝自誠而明惟睿作聖即古而克永世遜志而敏厥修徃行前言已并包

於聖學博聞強識更兼利於儒林肆命詞臣廣裒事類
囊括千經之蘊網羅百氏之言公孫數萬之說辭披圖
可見虞初九百之小說開卷盡知嘗資睿覽於西清益
萃靈輝於東壁討論至當炳若丹青而不渝倫類相從
煥乎朱紫之有別論纂實繫於鴻博流傳尚隔於要荒
臣僻處小邦粗惇末伎在漢則伊秩嘗聞於入學於唐
則吐蕃亦見於舊經輒援舊比以上干果奉睿恩而賜
許叢書簡編之富光華象緯之傳豈伊龍閣之珍藏乃

作鷄林之祕寶茲蓋伏遇皇帝陛下深慈恤隱夷量色
荒以孝奉先故誕布前朝之美以仁柔遠故曲從異域
之求念臣嘗獻於逸書憐臣夙朝於北宇申錫皇文之
千卷俾參舊約之八條肆是誤恩猥沾遐裔臣敢不敬
銘厚賜詳繹羣言流播三韓共仰文明之化分傳五族
俾知賚予之私



欽定四庫全書

集部
丹陽集卷
三四

詳校官庶吉士_臣張溥

侍讀_臣孫球覆勘

膳錄監生_臣任溥

欽定四庫全書

丹陽集卷三

宋 葛勝仲 撰

書

上揚州寒尚書書

某南州細人材智下無所取雖服讀儒衣書而器能無
一加人者今大名守林公不知其不肖而稱之於朝俾
得預試校官蓋棄其最爾之官守挈之而西川陸走二千
里留公車者凡三見朔月也因是得曳裾卿相之門而

側聞聖天子初政矣方將封殖中外瓌俊者傑環布列
位使輸智力共圖康功故未及御殿而尺一搜賢急於
星火韓公自定往黃公自亳往蔣公自慶往其餘諫垣
詞掖學省藏室之臣粲然一新皆自外寄名也尚書忠
義耿耿議論剛正勲閥暴著上方願見竊謂宜如曹相
國促治裝行即召矣某也寄住淮海幸望履下過不自
料請問可乎語曰貌言華也至言實也又曰狂夫言而
智者擇焉又曰君子善謀小人善意竊意主上見尚書

勞問之外必訪以天下大計施設所宜先者儻跽而進
曰神宗皇帝創立憲令大功數十天下歸仁先皇帝駿
惠紹復不敢失墜天下稱孝今惟取兩朝成憲而踵之
國是定矣嗚呼言脫於口而利被海縣功施社稷忠與
望說爭衡名與天壤相弊也某之心天下之心也某之
言天下之言也某所望於尚書亦天下所望也尚書毋
謂某位卑言高狂斐僭越而誅之崧高峻極加以一塵
雖未云益豈有損乎尚書獨不見晉伯宗漢龔遂事乎

晉伯宗乘傳過絳辟傳曰梁山震傳人曰山有朽壤而震何怪焉及見晉侯果問具以傳人語對晉侯大說龔遂自渤海召王生曰即上問何以治渤海必曰此聖人之功非老臣之力帝曰安得長者之言哉遂即曰乃掾史教臣夫伯宗非不及傳人也王生非賢於龔遂也然二子披心析肝而信之師用其言動寤萬乘者言中於實會於時而納之有素故也拳拳之誠實在於此若夫飾猥蔓之辭蘧條戚施以事容媚非惟某所不能想亦

尚書既聞而厭聽矣干冒尊重無任戰越之至

上兗州太守書

某聞濯金浣錦取魚鹽則貴有求賤之勢培山益海資
塵露則大有納小之理商君佐秦氣馭可炙而趙良以
苦言藥之狄梁公峻節雅望為唐名卿而元行冲願備
藥籠中物夫踈賤之士騁辭開說以干大吏未必無一
得之慮此兩士者足以觀矣願賜須臾之間宿留瞽言
何知無毫釐助萬一耶嘗觀昔善宰郡者布政處事

趨時循俗而弛張無一定之論故力寡功倍而民歌舞之崔郾治號不答一人及涖鄂則誅罰一不貸其說以謂陝土瘠民勞吾撫循不暇鄂土沃民剽非威不能治也柳仲郢尹京兆政稱嚴明人莫敢犯及鎮河南則以寬惠其說以謂輦轂之下先彈壓郡縣之治本惠養也若二子語政庶乎不謬通方之訓矣閣下以名士典郡所至有異等之効塗歌邑誦襲滿人耳果何以得此聲趙魏之間哉豈非能觀察風俗隨宜制變故邪且閣下

以趙之俗剽悍而嗜寇魁桀而侮法赭衣滿道桴鼓相聞故痛以法繩之鉅兩之姦不舍強梁褫氣不敢跡境閭下之至上黨適歲荐飢殍者塞塗于是推行荒政已責緩刑俾豪右振廩而千里皆果腹焉惟知緩急先後之方故寬猛異施而兩郡各治及乎詔書明揚改付東魯車轍未至而閭里之士偷度臆計以為是必致隆于學校矣今旌麾所臨之地即古泰山魯二郡也宣精在上奎婁為文宿畫野在下洙泗為儒鄉闕里之堂矍相

之圃故基遺址歷歷在目故其俗守經學其人多秀令
號稱禮義儒學之國凡虔命而撫封者率以文教先焉
亦猶趙之當用猛潞之當用寬也今視事彌數月矣條
教既修威令既立彫瘵者蘇矣跋扈者戢矣下至金穀
米鹽簿領期會倉猝冗末無不垂省獨郡學未有半辭
及焉今齋堂傾圯蕪棘不除生師栖栖有陳蔡絕糧之
色閣下亦有意乎儻如朱博所謂俟堯舜出而陳說之
則無如之何矣昔魯僖公旂色鑾聲親臨泮水之上飲

先生君子以酒而順彼長道故淮夷徐宅莫不來同此
前事之驗也抑又聞論事而不遠嫌者宋人有勸其鄰
伐不祥之木從而請薪之類也薦言而不俟信者婦始
入門而戒其僕無咎服之類也某待罪教職望履幕之
日淺而遽貢狂直疑若自為道地上之則失于不待信
次之則病于不遠嫌惟寬明君子諒之而已

荅李集正書

某愚不肖經學行誼不能超絕等類謬恩推擇使授業魯郡

懼不振職私慄慄也單車始至人士見迎者百數獨足下
奮然寵以書辭猥見褒假且望僕以尊顧眄剪拂之重僕
雖不敏敢不因來示所稱述而廣之以曉左右者之聽昔
項橐七歲為孔子師潁川荀淑高自標待於名士少推許
一日見黃叔度於汝南逆旅中竦然異之謂曰子吾之師表
也王戎之於阮步兵禰衡之於孔北海少皆二十歲而相
與為歡友河內之游平原之薦著事者以為美稱也蓋師
取四術友求三益年齡後先正自不校足下引韓退之之辭

曰生乎吾後聞道也先乎吾吾從而師之意謂僕年雖
尚弱而宜居師表之位顧僕何足當之徒以黽勉祿仕
有不得已者昔韋中立見柳子厚于南州欲北面就弟
子列子厚逡巡遜却不受至退之則不然作進學解以
誨諸生又為師說以授李氏子抗顏為師不顧怪罵夫
二子以文藝卓越固為一世宗仰顧或抗或遜矛盾如
此何哉退之任教職子厚居散地故也僕雖閹滯而代
匱黷宇苟有銖髮裨補固不敢以犬馬齒少為解矣試

以一事塞雅意足下屬詞雖工而許與不自愛恐論議
士它日不以標鑒相許也商周灝噩之文章卓然傑出
于千百歲之上聖人不生斯文未易再覩今以牽彊酬
應之文輕見比擬不太誣乎至論宏辭舍劉柳而獨推
陸贄裴度甚善是欲以名義公閥見勉也三復嘆息謹
受教矣

上監職書

某嘗聞何武行部先即學宮延見諸生試其誦論課以

得失已乃入傳舍問墾田見二千石其恆尚儒雅有如
此者又聞竒章公始隨計京師聲望未白韓退之欲與
延譽因携皇甫持正闕亡而過之大書其門曰某日愈
混同謁由是僧孺之名籍籍動等輩其成就後進有如
此者每涉傳記究觀達人勝士所為魁然拔俗遠甚未
嘗不置卷遐想以為曠數百年未易再睹誠不自意親
於其身而見之恭惟閣下以聰明之才位部刺史崇儒
拔士之聲嘈嘈乎列郡私固已藏諸胸中矣今茲車轍

馬足始至魯郊戴襪垂纓之士方且引脰拭目以觀所
為然而金穀未問也簿領未核也囚繫未慮也牒訴未
閱也道從傳呼先臨泮水之上降輿躋階款謁廟堂要
笏沃醑槃躒磬折退即學庭延見胄子雍容垂接與白
屋亢禮悼稍食之穀薄嘆室廬之頽陋慨然有意調而
新之茲非何武之用心歟某受性方拙既不能激昂奮
迅以為身謀又不能喔咿乾沒以追時好常編篋凡自
守窮約閤下乃欲卯而翼之屈二天之尊禮一介之賤

使行路指目曰是雖無似然鉅公嘗一聘矣吳坂之鳴
安知無三倍之價茲非昌黎之好事歟矧自近世達官
大吏類以刀筆期會為急至于教化本原往往浸不屑
意視校學之庭則曰此虛器也顧師儒之職則曰此左
局也輕巖菲薄以儒為戲彼又烏知三綱五常所繫而
薦紳大夫所從出乎獨閣下遠覽深識留情藝文施設
緩急輕重與世異趣瞠者警焉洙泗儒風將配疇曩而
於樂泮水之頌不得專美於前日矣吾道賴以振持後

來因之競勸豈特某與逢掖諸生受賜而已哉爵躍蹈舞實為天下賀也私布腹心惟閭下察之

謝曾運使書

某至愚極陋不敢自齒於搢紳諸公過聽謬使敦學魯郡視職滿歲而經以疑質者無訓發之功文以瑕求者無詆呵之效大懼瘝曠以羞儒林惟是繕完室廬營度稍食竊竊然為諸生庇身餬口之計姑欲杜衆毀而塞吏議如是而已間者使車按臨始獲肩隨掾吏趨走幕

下幸蒙不以常輩知遇妄以胥宇繼粟為請退念位卑而
劇上交淺而求奢不揣其本而惟末是圖三者皆宜得誅絕
之罪心口默計不寒自栗敢圖厚德闊畧不問又從而聽許
之意無猶豫之疑文無勘詰之擾一日而賙三十萬觀聽者
驚焉方縣官經用窘急之秋領使事營輯歲計籠絡利源
毫釐纖屑稍可紓目前有司之急者無不取也權酤龍斷與
夫州邑之賦少闕常額則奉職之吏望風伺指憂虞惴栗之
不暇今獨無功而受厚賜自非大人君子留情風教進誘後

學詎肯瘠彼肥此耶洙泗鄉校有幾廢復興之漸圓冠侈
袂騰頰頌譽皆曰上之德我者如是不激昂奮勵則為匪
人魯道庶乎興矣功利之博與三十萬之費輕重小大為
如何哉若夫區區嗜學之心不為憂米鹽亂因得卒業又
不至失職而去此義恩及於一已而非敢私謝者也抑又
聞士伸於知己尚敢以一事浼聽仙源縣學賜田歲租具
在而田無所歸甚有可併之理閣下盛名雅望朝廷方取
信誠能書盈尺之紙轉以上聞不傷公私不戾文法其勢

宜必得此邦受賜又非特三十萬而已也哉我大石深
刻頌美者不在他門而作為聲詩者亦且不勝聽矣偶
進記為謝又因以請惟執事實圖之

上白祭酒書

某聞江左辭格變永明體挾微倡始實自隱侯辯平頭
上尾之差示切響浮聲之奧慷慨著論以謂靈均以來
此祕未覩故後來人士爭宗仰之或擊節賞帶坻之句
或援筆擬回文之銘于時有文章冠冕述作楷模之諺

凜凜乎儒流盟主矣宜其自高待遇特慎許可然而鑒
獎後輩惟恐一士名譽不由己立也故見王筠則曰自
諸賢零落玩好殆盡不意疲暮復遇盛德一見朱异則
曰天下惟有文義碁書卿皆取去何獨不廉一見江革
兄弟則曰御二龍於長塗騁逸驥于千里一見范岫則
曰范公該博胡廣無以加也一見孔休源則虛已引接
位之朝貴之上而與之商畧文致觀顧歡秀才策則曰
過江未有此作觀何思澄廬山詩則曰已所不逮觀劉

總文心雕龍愛其文理每陳諸几席觀劉顯上朝詩稱其藻拔至寫諸齋壁雖劉之遴乳童曹景宗盤夫而片語寸長未嘗靳齒牙餘論也乃若談地理而詢崔慰祖議禮器而質劉士深寧以身受遺忘之譏而樂為二子延譽又其用心懇到者也其深閉固拒不少假借者特鍾磬一人將磬果無可稱錄耶或嗜好酸醎人各異也雖然隱侯身為佐命功臣位處端右多士榮槁出其舌端而泯默寒蟬無所援引則雖有題品人物之長亦徒虛

美而已故史家猶以無所薦達少之恭惟閣下以名士
識拔為朝廷巨公學期于見聖而不肯誦記傳注文貴
于明道而不肯尋治聲韻度越隱侯百等矣承平恢儒
逢掖競勸懷圖挾術者雲會學省而詔書屬以司成之
任又非艱難時祭酒比也竊謂山林畎畝窮閭隘巷魚
鹽板築弋獵負販與夫冗僚末位一藝可錄而聲跡沉
下未徹當塗之聽者皆閣下責也昔諸葛孔明高卧南
陽王景畧習隱鄴都未有以瘡人非徐庶徐統出力而

遊揚之則亦秉耒之下農鬻畚之賤伎爾張茂先賦鴈
鵠宋廣平賦梅花託意引類以自表見阮嗣宗蘇味道
一見而器之故隱然名重于世卒為望人間巷士欲自
致于青雲之上非得先進鉅人羽翼而雌黃之無以致
也伏惟水鏡者動心焉若乃箴邪說之膏肓振前言之
木鐸使元豐成均之政令煇然勃興此自閣下所優為
方將延脰摘耳而觀聽其效不復云云干冒崇重無任
悚悸之至

回施仲廉秀才書

某啓盛暑特煩顧寵且書文編見教迫于行役未暇周覽已觀經史首篇貫穿典籍辯正謬誤皆衆儒所未到非鴻博好古之士孰能為之嘗鼎一臠知天下之味則二十篇之書皆名筆也唯中間論春秋趙穿弑其君吾子謂丘明移之趙盾遂罹喪明之報若爾則穿果自弑而盾不知也宣子雖傳載其美非一然此則不容不知高貴鄉公之弑論者不肯以惡歸成濟而歸賈充又不

肯歸賈充而歸典午故有但見其上之語由此言之南
董立史法以戒萬世而孔子因之所以誅首惡也似不
可輕議其它論易二典皆可以感發後學欽嘆不已序
引宜得顯者以取重于世而僕非其人也既不敢承命
并書復納幸亮之

上前宰相書

某七品冗吏抵罪竄逐得邑嵩壑間自安貧賤之分忽
忽校吏考不敢數以竿牘塵記室退念幸蒙相公不以

常輩知遇曩雖得罪于朝廷未得罪于名義今隸迹丹
書低簪把板為折腰吏相公豈以屯冗遽移眄接之恩
哉因飾固陋之辭叙悃誠自通願垂須臾之聽使畢其
說某竊在昔名節之士操守素定事至物來以其素定
者處之不計禍福利害而叛其所學也輕于蹈患害而
重于隨時改度喔咿俯仰故能風節巍然與霜日爭光伏
讀舊史竦然慕之曩者誤沐過聽得備官使貴戚有沮
撓教濫者抗章繩之近習有猥見辟置者潔身去之此

皆分義之常而相公廣坐譚賞此其意豈以碌碌凡流
見望哉提挽不已遂得廁列文昌顯曹常欲激昂奮拔
稍自效見以報恩獎而未有路會相公暫解鈞軸遂邪
說叢興中執法建議紛更上及僖祖殿室表裏影響合
為一辭某非不知脂韋享厚福婢直賈竒既獨念名教
至重期待甚深不當選軟瘰厥官因援引古義謂不當
罷奉常諸僚是之繼為奏議以上風憲不容相次斥逐
直注醜地某得邑黥斂有湯鑊最沸之稱投身于兵戈

殺越之鄉鬪智于牒訴紛紜之地心疲神竭與九死為
鄰而處之甘如飴蜜者趨捧定也意相公未燭首末故
詳布腹心此言朝間夕填溝壑無復遺恨恭惟相公光
輔聖政八年勲名德澤旁照華裔極天下金石竹帛不
足銘功而頌美拔士數千百人寘之顯列山陬水濱惟
恐鑒采未至可謂無負于人士矣今茲懇謝機政願神
燕處薄海內外黃童白叟猶知歌狼跋九罭之詩引領
以望而況門下士哉雖然名士之用舍世運繫之非人

力也孔子曰天之未喪斯文也匡人其如予何孟子曰
天欲平治天下當今之世舍我其誰哉伏冀珍練眠食
為天下自重

答王齋長書

某才智學問無足筭錄又方竄逐于朝宜人士擯而弗
顧吾子獨惠然見存抵以書幅且引李白不願萬戶侯
願識韓荊州之語何嗜好趨尚與俗背也韓朝宗行事
雖史篇漏逸而白推以為人物之權衡且踵門求見資

以收名定價其非碌碌凡士審矣顧僕何足以擬之然
有以知吾子好學求益之意深也昔之名儒鉅公聞某
所有賢士則汲汲求見未必不甚于士之求之故皇甫
規喜見王符則曰徒見二千石不如一逢掖桓大司馬
喜習鑿齒則曰三十年讀儒書不如一詣習主簿以吾
子齒壯氣銳敏于文詞稍自奮激則潛夫之篇魏晉之
論不難及也此政鄙心所願交况逃空谷而喜足音之
時乎承暫留縣學僕以職事當日夕繼見承音旨之日

未父也深竊自幸因叙以為謝

答李解元書

某自入境蒙人士以書見及者十數遣辭立意褒與過甚皆非僕所敢當至吾子書辭比擬大非其類周公孔子大聖人也如僕輩未免為鄉人豈可同年共世而語哉禮曰擬人必於其倫昔柳子厚牧柳州有杜溫甫者以書為贄亦有周孔之說子厚皇遽遜避至累數百言夫子厚雖有附麗匪人之過然文章妙一世學問亦不

碌碌且猶云爾況僕輩又遠子厚數千丈乎雖佩厚意
然不敢領納吾子文辭婉縟固自瘡人惟太不慎品藻
此亦夏璜之微瑕也因載書為謝併以相曉

與程嘉量秀才書

數辱見臨猥示造述昨日復拜雅貺開編疾讀如遊玉
圃於藍田之郊如聞咸池於洞庭之野懽耳驚目方咨
美之不服廼有師資之說何撓捫過乎柳子厚於韋中
立猶遜避不敢當况吾子學識加中立數等而僕望子

厚萬里乎雖然語有之矣學所入者淺體所安者深閑
習禮容不如式瞻儀度諷誦遺言不若親承音旨又曰
望之儼然乃不言之益與田蘇遺忘其鄙心則夫求當
世望士與之周旋乃吾子之善學第僕非其人爾必欲
規磨則書辭論子厚似太過子厚節操視退之雖父子
然文章兄弟也子厚不敢以師表自處退之獨抗顏為
人師既作師說以著傳道解惑之益又為進學解以誨
諸生非其不同意者退之分教四門館則授業乃其職

子厚方錮散地不啾啾召閹取怒爾古賢勝人處事自有次第吾子以為何如披讀有暇時過縣齋以既所欲言者

與制置發運書

初春氣和恭惟神相忠嘉台候萬福某碌碌郡寄實隸部封日託大庇寧不知德伏奉詔目委以經制羨緡均糴二萬斛具悉雅意施行則粟出於萬室違命則罪集於一身某豈不知自謀實以弊邑乃水國蛙黷之與同

處東南歲漕百五十萬斛而吳興獨無半菽之輸則土地不產米明矣去歲雖僅得下熟而暴風為孽於垂實之時收數不能什六比郡荐飢舟楫運致者尾相銜也今在市之米殆可粒數而中下戶已無鍾釜之積矣朝廷方復轉運之舊弊邑當輸米四萬餘斛日夜鞭笞科督殆將如額而民已病矣今米價正踴一斗將三百餘儻以百錢糴一斗何止倍蓰之償則必有流徙飢殍之困所以累承公檄不敢從命又况執事元奏請止於平

江常秀三郡均糴初無吳興之文則是執事已知吳興
非產米之地矣今乃欲移嘉禾所賦於不腴樊邑瘠此
以肥彼未燭所以也就使旋降朝旨比旨下恐亦已過
時難輸矣伏望台照惠顧此方特寢前命豈惟某受賜
實數千萬戶戴不貲之德謹專介布腹心干冒使威無
任皇恐待罪之至

答顏教授書

衰羸不堪當世用尚得竊吏二千石之祿以餬其口私

意吳興人士淵藪必有卓犖氣義之士握筆搦牘日相
規磨使不干于罪戾而到官彌月聞然未有聞也忽得
來示詳複累千言析理叙事汪洋昭晰若五湖東顧不
見涯涘固深服左右之工於文矣不知僕之不肖使有
所建明以蘇民之急又竊服左右處心積慮之依于仁
也昔王生嘗以言警龔遂而任延亦以禮感龍丘僕無
似何以得此所條預買誠中時病近歲縣官經用不足
給直每後時又胥吏賕私公行更復輕重上下其手使

齊民重困矯革之急誠當如奉漏甕而沃焦釜然所陳
四弊亦尚有可論者願他日更僕議之得暇時過郡齋
不宣

與胡學士書

甘露僧至奉四月五日示問具審長夏向暑寓居僧廬
種學味道菽水孝養文履佳福乖隔十有一年中間家
國之變可駭可痛可憂可唁衆多如髮皆蒙詳叙筆勢
瀾翻既喜詞藻之日新交情鄭重又諳眷與之不替幸

甚幸甚所寄刻漏銘典雅似陸佐公而隸法似劉寬碑
普賢像記竒崛似柳子厚而安養三贊以辭達意似玉
局老人久矣不見斯作也雖自知岨嶬疲暮之人窮口
談譽不能增公銖髮之重顧夙嗜在此政自不能不擊
節賞味爾百圍之木干霄蔽日必飽霜雪之摧抑風雨
之震凌然後能回萬牛而中大厦古來賢聖類因流離
竄逐勞筋苦志空乏拂亂然後能以名德垂世而傳後
退之貶陽山投身于蛇虺蠱毒之地畫字于烏言夷面

之人後謫揭陽冒海氣蒸霧之毒有鱷魚颶風之憂可謂困窮矣終為一代名臣太史遷南遊江淮上會稽窺九疑泛沅湘北涉汶泗講業齊魯困阨都薛過梁鄭而歸登穹山峻谷之嶄絕目大川激流之奔注以佐其豪拔之氣而著書五十二萬餘言遂為史家之冠吾友頃者蒼梧之遷踰年始會恩往返萬里川陸艱險無不歷崑壑瑰瑋無不觀前二說殆兩得之豈造物者有意降大任歟况復一二巨公軒輊而俎豆之公義既伸舊爵

旋復而一蹙青雲指日可俟則前夢不足道也某晚塗
薄祐第二子昨緣鎖廳預薦因逗留拱州與其姊及姊
夫俱為金人所掠至今不知存亡初聞實不賴生日遠
日忘偶留殘息屏居江壘會科調不堪命避地吳興依
薄業以餬口今四年矣所居號寶谿連甍一大聚落日
須租辦而十里有菁山隱庵林谷奇勝時以煙艇往來
又里中屋廬雖屢遭灰燼而書籍偶無恙近者輦至數
簏頗有遮眼之具長子立方繫官雲間欲歸未遂一一

薦聞恐公念見及也往嘗以韻語叙懷寄澶淵不識見
之否所令作普賢贊固願以筆舌結華藏之緣況事跡
殊異如此敢不在念續當馳寄也公學識文詞迥出儕
輩豈久閒者行用矣千萬保衛以須